

卷四

乾隆蕩平準部記

同 戡定回疆記

同 綏服西屬回記

同 新疆後事記

道光定回疆記

同 回疆善後記

伊8
677
3



門 伊
號 677
卷 5



聖武記卷四

乾隆蕩平準部記

邵陽魏源撰

準部自噶爾丹以後三世皆梟雄能用其衆至乾隆
十年噶爾丹策零死而所部遂亂初策零有三子次
子那木札爾以母貴嗣汗位童昏無行恣睢狂惑其
同母女兒約束之稍長遂以讒幽其女兒多戮宰桑
於是其女兒之夫與諸台吉攻殪之立其庶兄刺麻
達爾札而大小策零兩部裔則謀擁立其弟策妄達
什大小二策零者皆名敦多卜準夷同族台吉以謀

聖武記

卷四

勇為策妄父子兩世將兵西破衛藏東摧蒙古者也
 故大策零之孫達瓦齊與小策零之子達什達瓦等
 皆為國人所嚮亦皆為刺麻達爾札所忌俄策妄達
 什與達什達瓦復被翦鋤於是達瓦齊與其黨阿睦
 爾撒納奔哈薩克阿睦撒納者故拉藏汗之孫丹衷
 之子而策妄那布坦之外孫也丹衷妻策妄之女先
 生子班珠爾而丹衷被戮復有遺腹改適輝特部酋
 生阿睦撒納長而狼戾陰狙見準部內亂欲搆使自
 誣而已乘其釁初謀擁立策妄達什不遂復挾達瓦
 齊以逞刺麻達爾札遣台吉將兵二萬搜討二人

于哈薩克期必獲以除後患阿睦撒納遁回舊游牧地
 潛簡精銳千有五百由闡勒奇山路裹糧晝伏夜行突
 入伊犁誘其腹心為內應遂襲殺刺麻達爾札以已和
 碩特種國人未附乃推立達瓦齊為汗達瓦齊族貴而
 無能旋為小策零之孫濟噶爾所攻敗兩酋爭立各徵
 兵于諸部諸部落莫知適從國中大亂阿睦撒納復為
 誘除濟噶爾而還達瓦齊于伊犁特功益驕桀初四衛
 拉兵伊犁最強阿睦薩納時為輝特台吉居雅爾雅爾即塔
 爾巴哈臺在伊犁極北與哈薩克連界塔爾巴哈其同
 臺者蒙古語多水獺也在伊犁東北一千九百里
 母兄班珠爾為和碩特台吉居庫爾烏蘇又取都爾伯

特台吉達什之女乃襲殺達什脅降其子納默庫而自
 遷帳於額爾齊斯河額爾齊斯河者回語道緊之謂言其河水湍溜駛急也在阿爾泰山之南二百里科布多之西三百餘里在雅爾之東烏魯木齊之北各八百餘里平定後為屯田之所阿睦爾撒納令行三部遂侵掠伊犁邊境二人復大隙達瓦齊三遣兵討之皆不克乃自領精兵三萬壓額爾齊斯河又使其驍將瑪木特將烏梁海兵烏梁海兵在東西夾攻阿睦撒納不能抗遂與納默庫納默庫在東共率所部兵二千口二萬東奔破關內附時乾隆十九年秋也
 達什達瓦之死其子孫其子孫在東亦降
 之篡其杜爾伯特台吉之東

上詢悉其內亂先封降人卹部眾並調西北二路土馬屯邊而阿睦撒納復率輝特和碩特杜爾伯特三部至上久知其為部眾所畏服可驅策嚮導且天時人事輻輳宜乘機大舉雪兩朝之憤詢謀于廷羣疑號號懲雍正九年博克托嶺之敗以深入為險惟大學士傅恒主用間出征與上意合尚書舒赫德及定邊左副將軍策楞奉命收降輒請留其頭目於烏里雅蘇臺軍營而部落悉內徙使不得聚而生變上斥其猜貳嚴譴之以尚書班第往代俾暫游牧於喀爾喀之札卜堪河札卜堪河受烏里雅蘇河之水西流至科布多境入于泊一作札卜噶阿睦爾撒

納入覲熱河備言伊犁可取狀 上大喜封親王其

二台吉皆郡王既而準部驍將瑪木特見諸台吉相踵

內附必召大兵知準噶爾事不可為達瓦齊不可輔亦

脫身來歸于是準部爪牙心腹盡至且指畫準部形勢

如在目睫定議明秋大舉直擣伊犁阿睦撒納及瑪木

特以為塞外秋獮時我馬肥彼馬亦肥不如春月乘其

未備且不能遠遁可一戰禽之無後患又準部東境以

額爾齊斯河與中國為界本杜爾伯特原屯地近接阿

爾泰山可屯田備餉杜爾伯特眾兼耕牧非準噶爾專

其兵皆屯額爾齊斯二河以其可宜先遣兵萬人據形

勢而大兵二萬整隊繼進 上從之二十年二月兩

路出師班第為定北將軍出北路阿睦爾撒納副之額

駙科爾沁親王色布騰郡王成袞雜布內大臣瑪木特

為參贊永常為定西將軍出西路薩賴爾副之郡王班

珠爾貝勒札拉豐阿內大臣鄂容安為參贊兩副將軍

各領前鋒三千先進將軍參贊繼之降人三車稜納默

庫等皆以所部兵從兩路軍各二萬五千馬七萬匹西

路出巴里坤北路出烏里雅蘇臺各攜兩月糧約會於

博羅塔拉河博羅塔拉河在伊犁東北三百里為南北

兩路會合之區山川水草形勢皆勝故阿逆叛後即踞此

地以號召南北時兩副將軍皆準夷渠帥建其舊燾先

進各部落望風崩角其同族大台吉噶爾藏多爾濟及舊回首和卓木先後迎降于是所至台吉宰桑或數百戶或千餘戶攜醕酪獻羊馬繹絡道左師行數千里無一人抗顏行者瀚海舊少雨至是則大雷雨以五月朔長驅至博羅塔拉河距伊犁三百餘里兩軍皆會達瓦齊素縱酒不設備至是倉卒急遣親信兩宰桑出令箭徵兵而自率宿衛親兵萬人走保伊犁西北百八十里之格登山阻淖為營我師遮獲其徵兵之宰桑具悉國中解體狀士氣倍奮爭渡伊犁河長驅追襲將及格登山夜遣降夷阿玉錫等率二十餘騎往覘道路阿玉錫

即乘夜建大軍之纛大呼入其營萬眾瓦解達瓦齊以二千餘人宵遁餘皆不戰降黎明我二十餘騎遂收其眾七千餘還大營達瓦齊踰冰嶺南走回疆其下半途逃散僅餘百騎以烏什城阿奇伯木克霍吉斯為已所善投之而霍吉斯已承我將軍檄即執之以獻并獲前青海叛賊羅卜藏丹津獻俘京師 上御午門樓受之皆赦其死論功行賞首獎大學士傅恒襄贊之功再加封一等公固辭不受班第封一等誠勇公薩賴爾一等超勇公而阿睦撒納晉封雙親王食親王雙俸其後達瓦齊霍吉斯亦皆賜封親王郡王入旗籍又釋故

回首大小和卓兄弟在伊犁者使歸舊部於是天山南北二路皆不血刃而定初四衛拉之分部也綽羅斯治伊犁和碩特治烏魯木齊和碩特自固始汗東徙青海後其烏魯木齊舊地遂為準噶爾諸台吉公牧之所都爾伯特治額爾齊斯土爾扈特治雅爾土爾扈特北去輝特治之部各有汗非有君臣之分也自綽羅斯渾台吉汗強盛伊犁始為四部盟長抗衡中國者數世上欲俟事定仍眾建而分其力而阿睦撒納志未饜必欲為四部總台吉專制西域特欲出自朝命則無後患乃自昵于額駙科爾沁親王使與班第為難而以已情託其歸奏時班第鄂容安留伊犁

籌善後阿睦爾撒納輒隱以總汗自處擅誅殺擄掠擅調兵不服賜衣翎頂不用副將軍印自用渾台吉菊形篆印移檄各部落諱其降言統領滿漢蒙古兵來平此地又陰使哈薩克布魯特流言非已總四部邊不得安與其黨曉夜聚謀詭秘叵測將軍參贊先後密以聞前有旨令阿睦爾撒納九月至熱河行飲至禮同四部台吉受封而阿睦撒納前與額駙約期七月下旬俟命額駙歸不敢奏至期無信而入覲期迫班第乃趣之行令喀爾喀親王額林沁多爾濟與之俱旋奉旨以阿睦爾撒納逆形已著宜乘其未發誅之如已入朝

可追及則追誅之時阿睦撒納已就道且有哈薩克貢使隨行班第恐哈薩克驚疑遂不敢發阿睦爾撒納中途遷延及八月中旬尙無信疑事且中變十九日行至烏隆古河距其札布堪河舊游牧不遠乃詭言暫歸治裝以副將軍印交額林沁使先行有降夷首其謀額林沁不信竟縱之去由額爾齊斯河間道北逸遣使迎其孛於札布堪河則上已密諭烏里雅蘇臺軍營并其弟班珠爾收之不半日而賊使果至得不遣賊四出煽亂伊犁諸刺麻宰桑劫掠軍臺蠶起應之時大兵已徹僅五百兵留伊犁歸路斷又厄魯特與賊不合者賊

皆先以計遣入朝所留皆其黨羽班第鄂容安等力戰走二百餘里被圍死之時阿逆黨羽不過二千餘屯博羅塔拉河各部皆不敢從副將軍薩喇爾陷賊中復潛約宰桑刺麻與戰而將軍永常西路勁兵數千屯烏魯木齊附近台吉宰桑數千咸投赴使驅策用之兼程進剿立可撲滅永常反疑拒退卻自木壘南退軍巴里坤并移軍糧於哈密故北路無聲援賊益猖獗上乃以先後敕除阿逆密旨及班第等狐疑之章奏宣示中外黜額駙親王爵赴軍效力賜額林沁自盡逮永常治罪以策楞代之玉保富德達爾黨阿爲參贊兩路遄進

討賊明年正月大兵長驅至特克勒河探知阿逆僅距一程以下皆稱阿逆急進可追及忽有報台吉諾爾布已禽阿逆來獻者玉保遂駐軍待之先以紅旗報捷於策楞策楞亦卽轉遞至京不知報禽賊者卽賊所遣以緩師也二月兵至伊犁賊已遁入哈薩克將軍參贊互相咎托言馬力竭頓師伊犁不進 上以諸臣皆非任事才特命大學士傅恆馳視西師召集諸台吉會盟驅策進討中途復召還五月褫策楞玉保職以達爾黨阿哈達哈代之兼命兆惠自巴里坤赴援達爾黨阿出西路擊敗哈薩克二千賊阿逆易服潛遁我兵追及相隔一谷

董二二三里賊倉卒不及駝載忽有哈薩克人來言卽欲禽獻但需其汗至乞暫緩師待時我師爭欲進捕而達爾黨阿遽下令駐軍不知言欲禽阿逆者又卽阿逆所詭遣也阿逆復徐颺去檄索往還頓兵數月無要領而哈達哈出北路遇阿布賚兵千餘于巴顏山不迎擊聽其颺逸諸從征降夷宰桑見兩將軍見賣無能皆輕之又適有喀爾喀撤臺之事事具前綏服蒙古記于是各降夷亦皆變初去年秋 上封諸降夷台吉於熱河噶爾藏爲綽羅斯特汗沙克都爲和碩特汗巴雅爾爲輝特汗其杜爾伯特本封阿逆及叛後改封車稜爲汗

其餘宰桑等各授官賚幣皆願歸發所部兵從征及見軍屢受欺郵臺內變有輕我心綽羅斯特輝特二部及哈薩克先叛都統和起被誘殲焉阿逆聞四部構亂亦自哈薩克歸會諸賊于博羅搭拉河欲自立爲汗準部復大擾亂策楞玉保逮問亦被害於途將軍達爾黨阿等尋皆被逮定邊右副將軍兆惠以千五百兵駐防伊犁聞變自濟爾噶朗河轉戰而南自十一月啟行戰於鄂壘戰於庫圖齊戰於達勒奇前後殺賊數千二十二年正月至烏魯木齊諸賊皆會連日數十百戰我兵無不一當百皆步行冰雪淖中履襪不完食瘦駝疲馬且

將盡二十二日至特訥格不復能衝擊乃結營自固特天大風雪驛傳聲息格不相聞會 上先命侍衛圖

倫楚率巴里坤兵二千間道往迎以三十日至軍圍乃解兆惠得新兵復往剿巴雅爾部落始回巴里坤

上以準部諸酋甫受封賞歸輒叛知厄魯特人皆不可德懷三月命定邊左副將軍成衮札布出北路右副將軍兆惠出西路大剿之會諸部落亦自相吞噬綽羅斯特汗爲其兄子噶爾布所篡台吉達瓦旋殺噶爾布厄魯特向不出痘至是則痘疫盛行死亡相望兆惠兵復長驅至各烏合賊皆敗走逆酋先後授首惟阿逆未獲六

月兆惠富德等窮追至左哈薩克時哈薩克汗阿布賚已與阿逆積釁且懼招大兵遣使入貢誓禽阿逆以獻適阿逆率二十人往投阿布賚先使人收其馬阿逆驚攜八人徒步夜走俄羅斯界我朝移檄索之是冬報阿逆患痘死移尸近邊命喀爾喀親王侍郎三泰等馳驗以聞於是命成衮札布以定邊左副將軍歸鎮烏里雅蘇臺時察罕度爾大營改設于烏里雅蘇臺而兆惠富德留軍度冬是年迎降之鄂拓克等軍過輒復叛并誘陷都統滿福于是二十二年春命兵八千分兩路再剿漏網之厄魯特時各賊分四支每支各一二千伺間出沒乃議兆惠由博

羅布爾富德由賽里木分兩翼圍獵約相會於伊犁皆分數路無大隊所至獮薶披山網谷及明年兩將軍南赴回疆又命親王策布登札布繼之又明年舒赫德阿桂等繼之並歷年剽掠臺站之瑪哈沁與煽亂助逆之刺麻櫛比禽馘無子遺焉計厄魯特四部中惟杜爾伯特部徙科布多以東之拜達里克河以車凌始終無一旦以兵禽納默庫有功獲保全又達什達瓦之妻當伊犁倣優先率所部叩關來投徙熱河編旗籍又舍楞率所部二千餘竄土爾扈特皆得追誅而和碩特之沙克都汗不從各酋之叛率所部四千人自拔內投巴里坤復

為都統雅爾沙善襲坑之

上旋鑿其枉于四部中

為不幸論者謂厄魯特之一大劫則固非無因以然也

初準部有宰桑六十二宰桑者管事官新舊鄂拓二十四鄂拓克為

其汗之部屬昂吉二十一昂吉者分支也乃各集賽九

新舊各十二專辦供養刺麻事務共計二十餘萬戶六十餘萬口猓猓其性封

豕其能不作賊者不齒于人數一人能劫數人者為壯

士能勞苦勇戰鬪各回城及哈薩克一聞其至則闔匿

奔竄虜掠驅載惟所欲相詈者至以厄魯特為詆厲其

民則爾汗又甚之專假昏媾以吞噬與國昏青海覆青

海昏拉藏戕拉藏昏土爾扈特逐土爾扈特昏都爾伯

特并都爾伯特世濟其凶狠生獯獯生豨致我 一

祖二宗三朝西顧盱食仄席戍塞防秋中國耗弊

仁廟 憲廟屢集廷議皆有此賊不滅天下不安之

諭焉數窮理極天鍾一阿睦爾撒納以傾覆之王師

初入兵不血刃矢不再發而天不許也王師再入師則

屢次壘則再因而天又不許也幾大幸又幾大不幸一

激再激以致我朝之赫怒 帝怒于上將帥怒于下

合圍掩羣頓天網而大獮之窮奇渾沌檣杙饕餮之羣

天無所訴地無所容自作自受必使無遺育逸種於故

地而後已計數十萬戶中先痘死者十之四繼竄入俄

羅斯哈薩克者十之二卒殲于大兵者十之三除婦孺
充賞外至今惟來降受屯之厄魯特若干戶編設
佐領昂吉此外數千里間無瓦刺一羶帳毒蓄屢世發
於一旦夫寧一阿逆之故哉即使阿逆不叛四汗分建
亦必不數年一反十數年一反王師旋罷旋興仍同康
熙雍正中已事安能耆定百年一勞永逸故曰天也軍
行所過旁近之國若東部哈薩克若西部哈薩克若左
五部布魯特若右十部布魯特皆奔走奉貢睚眦入覲
北盡俄羅斯界東盡喀爾喀界西盡布魯特界南盡烏
斯藏及青海東西七千餘里南北三千餘里
御製

開惑論設爲文學碩儒與通務大夫互相問難而 信天主
人申大義以折衷之明不得已用兵之意宣示中外祭告

陵廟立碑太學又勒銘伊犁者二勒銘格登山者一前
後天章照耀絕域命禮部侍郎何國宗率西洋人攜儀
器繪地圖徧測西北各部星度節氣日出入早刻列時
憲書頒發命鄂容安劉統勳考漢唐西域輿地今昔沿
革緝成圖志其名山川增列祀典者十有六歲時祈禱
班祝文焉于綽羅斯部舊地設總統伊犁等處將軍節
制南北路同參贊大臣駐惠遠城領隊大臣五其一駐
惠寧城又于都爾伯特部舊地設烏魯木齊都統一領

隊副都統一迪化城綠營提督一巴里坤領隊副都統
一古城領隊副都統一庫爾喀拉河領隊大臣一又于
土爾扈特及輝特舊游牧地設塔爾巴哈臺參贊大臣
一領隊大臣二又置迪化州于烏魯木齊設鎮西府于
巴里坤改安西府爲安西州裁安西道凡伊犁所屬城
九烏魯木齊屬城十有六屯堡不與焉皆屬天山北路
嘉慶中伊犁建社稷壇詔伊犁山河春秋致祭仍用乾
隆二十六年所頒祭文朕字改稱 高宗純皇帝廟
號並於伊犁之寶伊局每年仍鑄乾隆通寶錢二成永
以爲例乾隆年間凡兩定準部一定回部兩定金川兩

定廓爾喀一定臺灣及安南緬甸先叛後服總爲十全

武功文在嘉慶元年 嗣皇帝恭上 太上皇帝

寶冊

臣源曰漢之西域前稱山北六國後又稱車師六國車
師有前後部前王庭則今吐魯番後王庭則今烏魯木
齊也其西爲烏孫則今伊犁其北爲北匈奴地則今塔
爾巴哈台也皆爲天山北路行國非居國當其阻於風
氣間於山川我 朝亦嘗勤天下之力以經營之幾
與漢世匈奴大宛無異一旦迫天時順人事列亭障置
郡縣人又或以爲取之雖不勞而守之或太費烏乎兵

果否嘗增耶財果否嘗費耶南北兩路養兵萬有九千
 餘名設官千有四百餘員有駐防有換防駐防攜眷之
 滿洲索倫蒙古厄魯特兵則移自盛京黑龍江移自張
 家口移自熱河其換防番戍之綠營兵則調自陝甘歲
 支俸餉銀六十有七萬八千九百餘兩即內地應領之
 額項其增兵者安在內有新疆本地租稅茶馬疋棉花布可抵銀七萬八千餘兩三
 十七年十有一月 高宗斥四川總督文綬開捐之
 請諭曰自平定西陲以來酌減沿邊防秋兵馬及酌裁
 各省駐防漢軍糧餉馬乾等項除抵補新疆經費外每
 年節省銀九十餘萬兩歷今十有餘載歲出較少約積

存千有餘萬是以乾隆初年戶部庫銀止三千三四

百萬今已多至七千八百餘萬有盈無絀是新疆不

惟未嘗糜餉而且節帑其費財者又安在案新編識略第二卷

甘肅等處所減草料及京口杭州等處出旗漢軍俸

餉口糧馬乾折色等項每歲節省銀一百二十九萬

餘兩除抵新疆各城廉俸經費外止餘銀且北路屯

二十一萬一千五百餘兩詳後武事餘記田二十三萬八千六百餘畝南路四萬九千四百餘

畝歲交糧米共十四萬三千餘石盡支放外尚不敷

二萬三千石于舊存倉貯五十萬石內支補計兵屯

回屯民屯旗屯共十餘萬丁統轄于烏魯木齊提督

自官田外餘地聽民自占農桑阡陌徭賦如內地日

夫一消一息者天之道衰多益寡者政之經 國
家提封百萬地不加增而戶口日盛中國土滿人滿
今西域南北二路地大物賚牛羊麥麩蔬蕨之賤澆
植貿易之利金礦銅礦之旺徭役賦稅之簡外番茶
馬布緞互市之利又皆什伯內地邊民服賈牽牛出
關至輒闕汗萊長子孫百無一反是天留未闢之鴻
荒以爲盛世消息尾閭者也是聖人損益經綸之
義所必因焉乘焉者也中外一家老死不見兵革
較之康熙雍正間烽火偏近畿邊民寢鋒鏑中國
運鑲屯甲于科布多巴里坤且守且戰先後糜帑

七千餘萬者其勞倣又安在夫徂近安忘昔禍不可謂
智生齒日孳民財日匱反欲閉其大源不可謂智國用
之絀由名糧武俸之增河工歲修之費入旗口糧之重
文銀出洋之甚皆倍于乾隆中葉以前不探其本而漫
咎于新疆耳食道聽不可謂智孟子曰天下之生久矣
一治一亂西域之不治自上古至今數千載天欲使化
荆棘而康衢化幽谷而白日化榛狉而冠裳化瓊帳而
閭井則必得聖人而畀之且必剷銷磨盪一掃其舊而
後畀之傳曰文王基之武王鑿之周公內之言其道同
終始相成臣是以反覆于西陲軍事之本末覩一支念

聖武記 卷四 三
全體觀一隅。厘中國益三。歎于始事之固難。與終事之不易焉。

附錄

新疆南北路之蕩平也。以伊犁爲總匯重地。而烏魯木齊中外衝要。塔爾巴哈台邊接外藩。分設滿兵駐防。漢兵屯種。皆攜眷移戍。惟南路回疆則更番輪戍。其兵制可考者。伊犁駐防惠遠城滿州兵四千。惠寧城滿州兵二千。有百四十。其伊犁河南岸分駐錫伯兵千。索倫達瑚爾兵千。察哈爾蒙古兵千。有八百。厄魯特兵二千。八百。沙畢納爾兵六

百。皆射獵游牧爲業。屯種惟達瑚爾。又建六城。分

駐綠營。攜眷兵三千。開屯興築。星拱棋布。與伊犁

城環峙。共兵萬有五千三百三十。兼歲派換防於

回疆者八百。換防於塔爾巴哈台者千有五百。塔爾

巴哈台本有駐防兵九百。綠旗駐屯兵六。此北路百後撤去。駐防惟存換防及屯兵共二千。

駐防兵制也。其回疆南路則皆換防之兵。共五千

七百。有六十。哈密及哈拉沙各七百。葉爾羌及喀

什噶爾各九百。阿克哈八百。英吉爾沙四百。庫車

及和闐各二百餘。烏什及賽里木各百五十。皆綠旗

兵。由內地陝甘及烏魯木齊分年派往。惟喀葉二

城騎兵各三百英吉沙騎兵二百由伊犁派往初
 議三年一班後改五年一班各設辦事領隊大臣
 此南路番戍之兵制也東則烏魯木齊扼南北兩
 路之衝設駐防滿州兵三千四百六十以都統轄
 之兼轄巴里坤副都統駐防兵千古城副都統駐
 防兵千及烏魯木齊總理屯田副都統二員屯田
 綠旗兵四千又烏什屯田綠旗兵一千並屬伊犁
 將軍節制調遣此東路之兵制也其烏魯木齊提
 督則自安西提
標移駐又設巴里坤總兵哈密副將各轄綠
 營而節制於陝甘總督與新疆駐防相聯絡新疆
 駐防換防綠營皆陝甘二省移往其駐防滿州兵

則自熱河西安涼州莊浪移往察哈爾蒙古兵則
 自張家口外游牧移往察哈爾都統兩翼兵額萬
 人自移往新疆外今惟八
千有 索倫錫伯等兵則東三省移往厄魯特沙畢
 納爾則由新附編入沙畢納爾隨上爾扈特來
 投乃厄魯特之附庸小部或
 領以侍衛或督以屯官或隸于佐領其回兵則分
 隸各城伯克而總轄於將軍大臣惟攜眷駐防之
 兵有定額其番戍之兵三年更代以次增設無定
 額或謂南路回疆亦宜仿北路駐防與屯之制招
 華民實回疆變膏腴為內地勢尤順利尤大異日
 必有措而行之者

乾隆戡定回疆記

乾隆二十有二年伊犁甫定未大定同時復有回部之
 變回部者天山南路也天山為葱嶺正幹袤數千里抵
 哈密其左右為準回兩部回部即漢書城郭三十六國
 非北路諸行國比南北分路於哈密其由巴里坤踰山
 或吐魯番踰山經烏魯木齊赴伊犁者為孔道其由烏
 什阿克蘇逾冰嶺赴伊犁者為捷道雪山之陽冬夏湧
 流數十川貫穿於南路各城而滙於蒲昌海今呼為羅布淖爾
 為中國黃河之潛源其間大小回城數十回莊小堡千
 計漢書西域諸小國及次小國或僅數百戶千餘戶勝

兵或數十人數百人及康熙中 上諭所稱準噶爾

攻取回子千餘城皆並回莊回堡數之也最今昔道里

形勢出敦煌為古玉門陽關二關皆今敦煌縣治西行

至哈密為古伊吾避白龍堆大戈壁之險逕今闢展古

鄯善亦名樓蘭而至吐魯番即車師前部漢戍已校尉所治

唐交河明火州治皆在焉車師後庭在今烏魯木齊又西南行逕古

危須焉耆地而至車爾楚軍臺為漢烏壘城都護治焉

又西至布古爾為漢輪臺地又西南至庫車為古龜茲

唐安西都護府治焉又北逕賽里木城拜城拜城西即漢姑墨國

而至阿克蘇即漢温宿國始分三道一北行至烏什即

漢尉頭烏什西北皆布魯特地一西南行達葉爾羌為漢莎車乃

南渡玉河而至于闐一則沿烏蘭河岸徑西抵喀什噶

爾即古疏勒則漢唐以來西域建庭之所此外西北各

小國若循休捐毒盤陀等太氏皆今環回疆之布魯特

各部無君長不比數至其南諸小國如漢書所稱渠勒

意淪入瀚海如曷勞落迦城之比矣大計回疆東西六

千餘里南北千餘里西南北皆大山界之唐以前皆佛

教其以回回教著者則萌芽于隋唐而盛于元以後其

祖國曰天方更在葱嶺以西數千里有墨德墨克各國

當隋唐之際其國王謨罕慕德者生而神靈盡臣服西

域諸國始掃佛教自立教造經三十篇敬天禮拜持齋

戒葱嶺以西皆尊曰天使

回回語稱天使為別譜拔爾亦曰派罕巴爾

傳二

十有六世曰瑪墨特者當明之末年與其兄弟分適各國始自墨德踰葱嶺東遷喀什噶爾是為新疆有回酋之始即霍集占兄弟等之高祖也其回部舊汗本元太祖次子哈薩岱之裔世封回部及瑪墨特自西方至各回城靡然從之旋值厄魯特強盛盡執元裔諸汗遷居天山以北回部及哈薩克皆為其屬哈薩克行國僅納馬而回部各城則分隸諸昂吉徵租稅應徭役并質回教酋于伊犁康熙三十五年噶爾丹敗後其質伊犁之

回酋阿布都實特自拔來投

聖祖優卹之遣人護

至哈密歸諸葉爾羌是為霍集占兄弟之祖至其子瑪罕木特欲自為一部不外屬噶爾丹策零復襲執而幽之并羈其二子使率回民數千墾地輸賦長曰布那敦

亦曰博羅尼都

次曰霍集占即所謂大小和卓木者也乾隆二

十年夏王師定伊犁釋大和卓木以兵送歸葉爾羌使統其舊部而留小和卓木禮之使居伊犁掌回務及阿逆之變伊犁倣優小和卓木率眾助逆以與勤王之台吉宰桑戰踰年王師再定伊犁小和卓遁歸始自疑貳而我將軍等遣侍衛託倫泰往定貢賦未得要約將軍

兆惠復奏遣副都統阿敏圖往招撫初小和卓木之歸也兄弟共議所嚮大和卓木欲集所部聽天朝指揮受約束小和卓木以前此助逆自疑阻若聽朝廷處分必召兄弟一人留質京師如準噶爾之例我祖宗世以此受制于人今幸強鄰已滅無偏處者不以此時自立國乃長爲人奴僕非計中國新得準部反側未定兵不能來卽來我守險拒之饋餉不繼可不戰挫也計旣決集其伯克阿渾等自立爲巴圖爾汗傳檄各城愛曼集士馬峙糗糧器械以待回戶數十萬皆靡惟庫車拜城阿克蘇三城之阿奇伯木克鄂對等素悉小和卓忍

驚且懼我兵威皆奔伊犁兆惠乃令鄂對等從伊敏圖率厄魯特兵二千以往以責徵糧草爲名未至庫車中途鄂對等聞親族被僇各城響應且小和卓木心腹阿布都已益兵守庫車請急歸待大軍而後進伊敏圖不從以滿兵百人馳入庫車被害鄂對及厄魯特兵皆馳還事聞上以兆惠方有搜剿厄魯特之役乃

命雅爾哈善爲靖逆將軍二十三年五月將滿漢兵萬餘率鄂對等由吐魯番進攻庫車和卓木兄弟聞之率烏槍兵萬餘由阿克蘇之戈壁捷徑來援六月我領隊大臣愛隆阿等迎擊半途先殲其前隊三千于和托爾

聖武記 卷四
十六日又禽斬千有六百于城外鄂根河奪其大纛截其歸路和卓木兄弟斂餘兵八百入保庫車城我軍方喜二賊酋自投網可聚而殲也鄂對曰賊必不株困圍城勢必遁遁有二道一由城西渭干河涉淺渡一由北山口向阿克蘇戈壁請于兩要隘各伏千兵以待雅爾哈善不爲備終日棋奕亦不巡壘二十四日薄暮有索倫兵聞城中駝鳴似負重遠行之聲潛告將軍將軍復不信是夜兩賊酋及伯克阿布都果以四百騎潛出西門由北山口遁而守西門之副都統順德訥聞報尙以昏夜不發兵及曉始遣百人追之則已渡鄂根河去橋

斷後將軍劾順德訥以塞責并力攻城城依山岡以沙土柳條築成礮攻不入提督馬得勝使綠營兵穴地爲隧道晝夜嚴督不息將及城二丈守城賊瞥見地下鎗光反塹其外面實藁焚之我兵六百餘焦焉復劾提督以塞責皆不自請議處八月守城回目阿布都復夜遁突圍餘衆開門降 上震怒誅雅爾哈善順德訥馬得勝以徇其後并誅參贊哈寧阿時將軍兆惠奉命來京自請留軍以竣西事 上壯之乃命移師而南時兩和卓木奔阿克蘇其伯克霍吉斯卽前禽獻達瓦齊受封者也閉城不納給令赴烏什烏什亦不納于

是·小·和·卓·木·奔·葉·爾·羗·大·和·卓·木·奔·喀·什·噶·爾·兆·惠·使
鄂·對·撫·和·闐·而·霍·吉·斯·隨·軍·時·兵·皆·未·集·惟·領·步·騎·四
千·先·行·而·留·副·將·軍·富·德·剿·餘·賊·俟·集·大·軍·繼·進·時·小
和·卓·木·已·堅·壁·清·野·刈·田·禾·斂·民·入·城·使·我·軍·無·可·掠
又·于·近·城·東·北·五·里·掘·濠·築·土·臺·欲·持·久·困·我·而·大·和
卓·木·據·喀·什·噶·爾·相·犄·角·十·月·初·六·日·師·至·葉·爾·羗·陣
于·城·東·兩·翼·兵·先·奪·據·其·臺·賊·東·西·北·三·門·各·出·精·銳
數·百·騎·來·嘗·我·三·戰·三·北·入·城·固·守·不·出·城·大·十·餘·里
四·面·十·二·門·兆·惠·以·兵·少·不·能·攻·城·欲·伺·間·出·奇·先·營
城·東·隔·河·有·水·草·處·結·營·白·固·葱·嶺·北·河·經·喀·城·外·葱

嶺·南·河·經·葉·爾·羗·城·外·土·人·稱·北·河·爲·赤·水·河·南·河·爲·

黑·水·河·此·所·謂·黑·水·營·也

回語稱赤曰烏蘭黑
日哈喇水皆曰烏蘇

兆·惠·既

分·兵·八·百·使·副·都·統·愛·隆·阿·扼·喀·什·噶·爾·援·路·又·偵·知
賊·牧·羣·在·城·南·英·奇·盤·山·下·謀·渡·河·取·之·以·充·軍·實·十
三·日·留·兵·守·黑·水·營·而·率·千·餘·騎·自·東·而·南·甫·渡·四·百
騎·橋·忽·斷·城·中·賊·出·五·千·騎·來·截·我·兵·方·奮·突·其·陣·步
賊·萬·餘·繼·之·騎·賊·復·張·兩·翼·圍·攻·我·後·我·隔·河·軍·不·能
相·救·又·地·沮·淤·難·馳·騁·且·戰·且·退·浮·水·還·營·中·途·爲·賊
截·隔·數·隊·人·自·爲·戰·自·旦·至·暮·殺·賊·千·計·而·馬·多·陷·淖
亦·陣·亡·將·士·百·餘·傷·者·數·百·兆·惠·左·右·衝·突·馬·中·槍·再

斃再易明瑞亦受傷總兵高天喜等俱戰歿賊復逾河來攻五晝夜我軍且戰且築壘賊亦築長圍困我十七夜兆惠遣五卒分路赴阿克蘇告急舒赫德飛章入告賊於上游決水灌營我師於下游溝而泄之營依樹林槍礮如雨我師伐樹反得鉛丸數萬以擊賊會布魯特掠喀什噶爾我軍縱火攻焚賊營賊疑布魯特與我軍有約大和卓乃使人議和兆惠執其使射書諭以必先縛獻霍集占方許納款又掘井得水掘窖得粟三月不困賊駭爲神初 上以兆惠富德兩軍久暴露于外

將士皆勞頓于兩月前卽命靖逆將軍納木札爾叅贊

三格往代又命增調索倫察哈爾兵赴之及是兆惠檄愛隆阿率兵還阿克蘇催援軍遇靖逆等以二百餘騎徑進止之不可復遇害富德在北路聞黑水圍急卽率新到之索倫察哈爾兵二千餘及北路兵千餘冒雪赴援二十四年正月六日次呼爾璪遇賊五千騎且鬪且前轉戰四晝夜沙磧乏水齒冰救渴又乏馬■半步行九日渡葉爾羌河距黑水軍尚三百里賊愈衆不能進兩軍皆被圍萬里外適阿里衮以巴里坤兵六百解馬二千駝千合愛隆阿兵千餘夜至遙望火光十餘里知官軍與賊相持處也又途遇我往劫營之卒知望援孔

聖武記 卷四
急卽橫張兩翼大呼馳薄聲塵合沓直壓賊壘與富德軍三路奮蹙賊黑夜不知官兵若干萬自相格殺潰遁我師遂長驅進未至黑水營數十里又擊敗之兆惠見圍賊日少又遙聞槍礮聲塵大起從東來而營中所掘井忽皆知援軍已集卽勒兵潰圍殺賊千餘盡焚其壘賊大敗入城兩軍會合振旅還阿克蘇明年夏四月先遣兵援和闐復二回城之陷于賊者六月兵二萬馬三萬駱駝萬皆集阿克蘇又奏以布易回粟省運費三十萬乃兩路進師兆惠由烏什取喀什噶爾富德由和闐取葉爾羌每路兵各萬五千兩和卓自去冬見王師以

四百戰賊數萬繼以三千戰守數月已震雪天威至是遂弃城驅人畜逾葱嶺西遁初兩和卓在伊犁久惟墾種之回數千羈旅相倚及歸而舊部數十萬戶念其先世推戴恐後小和卓木顧虐用其民厚斂淫刑惟以伊犁同歸之回及新投之厄魯特爲親兵故衆解體其出亡也舊部罕從者二酋兄弟欲赴巴達克山其黨欲投敖罕各遣使往而敖罕不報乃赴巴達克山明瑞率前鋒千餘騎追至戰于霍斯庫嶺斬賊五百其地卽葱嶺之巔有黑龍池周數百里回語哈喇淖爾卽釋典所謂阿耨達也七月七日我軍四千餘騎追及阿爾楚山賊

聖武記 卷四
避其輜重婦女以精銳六千伏谷口而羸師誘我入險
我軍嚴陣爲備富德以火器健銳營居中明瑞阿桂爲
左翼阿里衮巴祿爲右翼別列奇兵援兵各二隊且以
兵殿如墻而進奇兵先奪其左右兩山俯瞰下薄賊陣
動我兵三面乘之追攻二十餘里戮賊千餘斬其驍將
阿布都等獲甲纛兵械無算我師僅傷一卒又三日至
伊西洱庫河乃巴達克山界也兩涯皆山曰和什珠克
嶺大和卓木先以家屬保河西嶺爲走計小和卓木以
萬衆據北山及迤東諸峰決死戰富德先令阿里衮等
由南岸趨西嶺而自擊東峰之賊仰攻逾時未克乃選

銃手數十緣山北顛俯擊之而阿里衮軍亦從南岸山
上以火器遙擊山北之賊其山麓又狹偪水僅容單騎
賊輜重徒屬擁塞我兩軍分扼其走路賊無所遁乃令
鄂對霍吉斯樹回纛大呼招降降者蔽山而下聲如奔
雷小和卓木手刃之不能止也凡降回衆萬有二千牲
畜萬計兩和卓木挈其妻孥舊僕三四百人走巴達克
山初小和卓木之擁衆而西也本謀襲據巴達克山之
國會以其酋不親迓怒斬其使欲約鄰部擾之於是巴
達克山酋興兵拒戰于阿爾渾楚嶺禽其兄弟將軍檄
索之函首軍門

是年惟霍集占函首其波羅尼都尸被盜去及二十八年拔達山始獲其尸并

其妻子以獻 回部平八月庚午捷奏至京宣示中外兆惠受

圍時已封 武毅謀勇一等公至是加賞宗室公品

級鞍轡富德赴援時已封成勇伯至是晉一等侯將士

及各出力回首額敏和卓霍集斯鄂對等錫賚有差立

碑太學凡戰處皆勒銘明年二月王師凱旋 駕親

郊勞于良鄉城南三里築壇設纛 上親拜天將軍

以下皆甲冑及王公大臣隨行禮畢 上御黃幄將

軍等抱膝跪見於是慈嶺以西布魯特愛烏罕博羅爾

敖罕安集延巴達克山諸國皆遣使來庭以喀什噶爾

為叅贊大臣建牙之所節制南路各城各城大者設辦

事大臣小者領隊大臣西四城曰喀什噶爾曰葉爾羌

曰英吉沙曰和闐東四城曰烏什曰阿克蘇曰庫車曰

闐展并東路哈密土魯番哈喇沙拉三城共十有一城

各城所轄回城或五六或十餘二十餘不等各設阿奇

伯木克理回務自三品至六品各隨年班入覲不得專

生殺其西四城換防之兵由北路及安西路更調阿克

蘇設局以葉爾羌紅銅鑄乾隆通寶錢與回地舊普爾

錢並行普爾錢者形橢首銳中回俗每五十錢謂之一

騰格米囊每受四石五斗謂之一帕特瑪當準噶爾時

竭澤以漁喀城歲徵糧至四萬八百九十八帕特瑪他

稅稱是葉爾羌歲徵匠役戶口棉花紅花緞布金礦銅
硝牛羊捨獮瓊蕪果園蒲桃之稅折錢十萬騰格他城
稱是且不時索子女掠牲畜故回民村室皆鱗次櫛比
堅墉曲隧以便害藏防虜劫及兩和卓木歸舊部雖減
科則而兵餉徭役煩興供給稍遲家立破及出亡又盡
其費以行民脂殆竭自爲王人後蠲苛省斂二十而取
一回戶休息更始焉回疆通外藩者惟喀城葉城兩路
皆西域都會和闐西則叢山東則沙澤近蒲昌海不通
外藩無互市惟產玉聞天下葉爾羌次之皆有玉山玉
河定制春秋采玉二次葉爾羌河舊不產玉自隸版籍

漸生玉石辦事大臣祭河神產玉乃崑和闐其葉爾羌
玉山曰密爾岱山距城四百餘里崇削萬仞山三成上
下皆石惟中成玉極望瑩然人迹所不至也采者乘犂
牛迺及其巘鑿而隕之重或千萬觔以準噶爾鋸截之
而使溫都斯坦玉工治之色黝質青聲清越中宮縣先
後貢 重華宮玉磬材特磬編磬各如于事又貢玉
冊玉寶各八十具白微黃者供宗廟白微紅者備慶典
任土作貢聲教所漸遂登禮樂四十五年以辦事大臣
高樸私役回戶三千盜采官玉事發封禁其山嘉慶四
年 詔弛禁常貢外恣民自采是歲葉爾羌獲大玉

三青者重萬餘劬，白者八千餘劬，白者三千餘劬，邊臣侈其祥以聞。上以沙磧輦運勞人，急指罷之。至今歸然存哈喇沙議者，謂南路之玉北路雅爾之金，鑛皆天地所以鍾福遐荒，誠得其人經理之，與屯田本末相輔，可盡省內地轉輸。洵國家所以制西域，佐中夏百世之利。

臣源曰：乾隆二十五年，詔曰：霍集占兄弟負恩肆逆，自取誅夷。至其先世君長一方，尚無罪過，非準噶爾之比。所有喀城外舊存和卓等墓，仍令回戶管守，毋得樵采污穢，以昭國家矜恤之仁。考霍集占高祖瑪墨特

之初遷喀城也，當明之末季，距其始祖派罕巴爾已千餘年。徒以來自天方，回人神明奉之，生即所居為寺，沒即所墓為祠。其時回疆各城尚皆有汗，皆元太祖之裔。非回回裔也。順治初，哈密有巴拜汗，葉爾羌有阿布都汗，吐魯番有蘇勒檀汗，皆以葉爾羌酋為大宗。每表貢皆葉爾羌汗署名。康熙二十五年，貢表稱臣成吉思汗裔，承蘇賚滿汗業。其時尚未為回酋。所有逮準噶爾強盛，攻破回子千餘城，自後無復表貢。而乾隆二十年大軍蕩平準部時，惟有吐魯番舊頭目莽蘇爾來降。此外無復蒙古遺種。吐魯番舊頭目亦已遷居喀喇沙失其故土久矣。然則回城各蒙

古酋汗蓋康熙中準夷滅之非回教逐之準夷既滅元裔各汗并執回教之長歸伊犁是則霍集占祖宗并未撫有回疆享一日之威福且派罕巴爾子孫分適各國喀城和卓特其一支非其嫡裔大宗也彼大小和卓兄弟又非有功德于回民也王師出之拘幽反之舊部飢附飽颺報德以怨漢杜欽之論屬賓曰德莫大于有國子民罪莫大于執殺使者 聖朝瀦其宮而封其墓誅其酋而弔其民風霆雨露帝何私焉巴達克山既獻和卓木之馘盡有其孥賄餘黨逃入溫都斯坦唆其興師而攻之鄰部愛烏罕又攻溫都斯坦而滅之於是大

和卓木遺孽逃入敖罕道光中復盜有西四城旋燔于天討語具別記若乃勒石昆侖之顛攷磬羣王之府披牒河源之上七萃卻其驅馳柏梁失其巖麗奧矣昌矣非下士所得詳矣

乾隆綏服西屬國記

漢書自玉門陽關出西域有兩道南道西踰葱嶺則出大月氏安息北道西踰葱嶺則出大宛康居焉耆諸國大率土著有城郭田畜與匈奴烏孫異俗蓋新疆內地以天山爲綱南回北準而外地則以葱嶺爲綱東新疆西屬國屬國中又有二由天山路而西北爲左右哈薩克由天山南路而西南爲左右布魯特雖同一游牧行國而非準非回非蒙古矣逾葱嶺而再西北爲安集延西南爲巴達克山爲愛烏罕雖亦皆回教城郭之國然嶺以西之屬國非嶺以東之郡縣矣方王師戡定準回

已拓版圖周二萬餘里豈尙有意貢譯于聲教不通之區臣妾于葱嶺以西之部而天時人事展轉輻輳若有意若無意不鞭笞而就我銜勒不招致而附我藩墉故阿逆之叛逋爲準部之大不幸而左右哈薩克卽以阿逆之逋而臣貢兩和卓之叛逋爲回疆之大不幸而布魯特及葱嶺以西諸國卽以兩和卓之逋而臣貢蒼蒼者若必舉天山之南北葱嶺之東西居國行國侏儻椎結睢盱之民盡以畀我 大清而後已豈前代發輶軒賁金幣鑿空招攜所幾其萬一者哉漢世天山以北爲烏孫逐水草諸國天山以南爲城郭三十六國唐

設北庭安西都護開置四鎮自昔風氣判然南北而北路雄強南路每爲之服役要皆各君其國各子其民時絕時通羈縻勿久更何問葱嶺以外欽定西域圖志貫串漢唐以伊犁當烏孫以喀葉二城當疏勒高車諸國至北而哈薩克則昔之康居安集延則昔之大宛南而布魯特則昔之循休捐毒巴達克山則昔之烏秣愛烏罕則昔之大月氏其朝貢獻見或有常期無常期商稅或有定額無定額不悉其遠近強弱夷險向背曷以籌控馭哉

哈薩克分左右三部左部在準噶爾西北右二部在準噶

爾西皆北界俄羅斯東去塔爾巴哈台南去伊犁皆千里其左部曰鄂爾圖玉斯東西千里南北六百里環境皆山西北境曰伊什河地苦寒其汗惟盛夏居之餘時逐水草游牧廣莫蕃茂谷量羊馬風俗物產文字畧同準部而語言稍異乾隆二十年二月準噶爾平阿睦爾撒納旋叛明年走哈薩克誘煽其汗阿布賚將軍達爾黨阿哈達哈兩路進討阿布賚遣和集博爾根以四千騎從阿逆走魯臘而自率千餘騎西行會于毫阿臘克山下以待七月將軍達爾黨阿兵遇和集前隊二千于雅爾臘山勁騎突其中壑破其伏賊潰斬六百級禽其

渠楚魯克又擊和集後隊二千騎于西路陷陣獲其纛礮斬三百級而北路軍亦敗阿布賚于毫沙臘克山下斬二百級獲其渠帥昭華什三戰三捷遂抵伊什河河者阿布賚庭帳也乃遣所獲二渠帥歸諭使禽阿逆而阿逆亦已遠竄明年將軍兆惠富德等復以兵西追深入阿布賚遣使請罪獻良馬且遣兵鄉導前驅誓禽阿逆以獻適阿逆先覺遁俄羅斯乃禽獻其黨而和集博爾根亦率三萬戶款于軍門將軍兆惠啟帳命東向坐將軍南向坐列筵食之牲體哈薩克回俗必持咒破戒乃食至是言爲

大皇帝臣僕敢泥禁因飽噉引

觀花馬射射鎖子甲皆徹札哈薩克益大駭服於是定互市地于烏魯木齊自後歲時朝貢爲例哈薩克之有三玉斯族猶準部之有四瓦刺族也左部鄂爾圖玉斯已臣其右三部齊齊玉斯烏拉玉斯亦稱中部西部西部亦名塔什干方與中部構兵阿布賚使與我使臣單騎入兩陣間指揮宣檄皆解甲聽命適我參贊大臣富德方追厄魯特逸賊至右部軍于莽格特城外遂詣軍約款其地東南接準部南接布魯特安集延納木干諸部西南踰塔什干西六百餘里地在葱嶺上游有哈喇庫勒卽釋典所謂阿耨達龍池蓋崑崙之巔也其哈沙斯

河錫爾洽河之間岡嶺綿亘西爲騰吉斯大澤尙有北部接俄羅斯境亦名布哈爾至今未通中國云左部逐水草爲古康居在烏孫西北大宛之東故寒暑徙帳卽康居國王冬居樂越慝地夏居蕃內之俗而右部則瀕河兩岸有城五與康居五小王所治五城合爲大宛北鄙故或亦言哈薩克卽大宛云

布魯特分東西部東部五西部十有五東部在天山北準部之西南近葱嶺距伊犁千四百里每部長皆以鄂拓克爲名舊游牧于特穆圖泊左右爲準部所迫西遷寓安集延王師定伊犁始復故地二十三年六月將軍

兆惠等追厄魯特逸賊至其界遣侍衛往諭其頭目薩雅克部薩拉巴噶什部兩鄂拓克不自主別推一年長者瑪木克呼里主之年九十餘體碩跌坐腹垂至地不能遠行遣使獻牛羊百頭將軍等燕而示之講武咸詫服曰 天朝騎射之利嚮雖聞之至于發必命中層甲洞穿馬上三鎗連發五矢左右迭射離馬及地騰上復馳雖厄魯特兵亦不及宜乎東殄準噶爾西服哈薩克何有于我等小部落 于是兼撫定霍索楚及啟台兩鄂克六日至其地并上四部共二千餘戶而薩婁鄂拓克亦于七月以所部五千戶來歸東布魯特五部皆

遣使入朝其西十五部則在天山南回部喀什噶爾城

西北三百里道由鄂什踰葱嶺而至其部落每部所轄

或二百餘戶或七百餘戶或千有三百餘戶共二十餘

萬口皆以額德格納部長之

部落雖分而游牧同地猶蒙古之四子部落也

逐水草游牧衣冠風俗皆同東部乾隆二十四年大軍

追逆回徑其地其渠長奉將軍書曰額德格納布魯特

部小臣阿濟畢恭呈如天普覆廣大無外如愛養衆生

素資滿佛之鴻仁如古伊斯于達里之神威如魯斯坦

天下無敵之大勇

所舉三者皆西域回部先代之賢汗猶中國頌堯舜禹湯也 富有

四海 乾隆大皇帝欽命將軍之前謹率所部自布

聖武記 卷四
哈爾以東二十萬人衆盡爲臣僕頭目等以未出痘不敢入中國謹以使入朝京師將軍兆惠表聞于是十五部落亦內附設二品至七品頭目由將軍大臣奏放歲進馬受賚減其商稅遣使巡其部落同內地焉布魯特持教同回部而居無城郭游牧同厄魯特而不崇黃教其疆域風俗皆介準回之間人貧而悍輕生重利喜虜掠雖厄魯特強盛時亦不能馴服之東部爲烏孫西鄙古所謂塞王種也西部則南屬葱嶺東連疏勒之休循捐毒子夜無雷等國也唐時爲大小勃律俗皆不土著無城郭故由鄂什口出葱嶺則諸部正當其麓

敖罕者葱嶺以西回國也有四城俱當平陸最西爲

敖罕城

亦曰浩罕亦曰霍罕

其渠居之最東曰安集延與布魯

特毗連去喀什噶爾城五百里好賈遠游徧南北二

路從安集延西百有八十里爲瑪爾噶朗城有二萬

餘戶又西八十里爲納木干城萬餘戶

納木干一曰奈曼又

西八十里爲敖罕城三萬餘戶皆濱那林河岸南揖

葱嶺四城皆有伯克而敖罕城額爾德尼爲之長又

有塔什干等城以三和卓分轄其衆亦附庸于敖罕

故亦稱敖罕八城然塔什干爲哈薩克族實不盡屬

敖罕也其西又有布噶爾國環之世爲勃敵敖罕風

俗畧同南路諸回城而鷲勇倍之乾隆二十有四年
 大軍追霍集占霍集占遣使欲投安集延安集延不
 報既而將軍遣侍衛撫定布魯特諸部至其境額爾
 德尼酋迓至城內日饋羊酒瓜果餼糧氈毳良馬詢
 訪中國疆域物產風俗形勢兵馬器械侍衛廣宣

朝廷威德額爾德尼畏慕奉表并上將軍書稱為
 至威至勇如達賚札木西特之將軍旋貢馬

京

師然亦無所謂汗血者其後霍集占兄弟為巴達克
 山所殲有博羅尼都二子逃赴敖罕故敖罕有回首

遣孽云

博羅尼都一作波羅尼都一作布拉漢書
 敦其長子乾隆中已俘入京師

稱自疏勒西踰葱嶺則出大宛康居諸國疏勒今喀什
 噶爾城從其城西踰葱嶺為出安集延之道安集延諸
 城土著耕田有城郭廬室而富强善賈善戰亦大宛遺
 風

巴達克山

亦作拔達克山

葱嶺西南回國也扼葱嶺之右去葉

爾羌千有餘里西北至伊西洱河有城郭負山扼險戶
 口十餘萬乾隆二十有四年逆回酋霍集占兄弟為王
 師所敗西奔巴克達山詭言假道往墨克國謁其教祖
 而縱兵肆掠其酋素爾坦沙因執博羅尼都而以兵攻
 圍霍集占於阿爾渾楚嶺霍集占屢敗被禽拘之于柴

札布柴札布者巴達克山繫凶處也時副將軍富德進軍瓦漢城移檄索賊素爾坦沙以逆酋與已同牌罕巴爾之裔欲縛獻恐為諸部所責既而霍集占復陰約塔爾巴斯國使攻巴達克山而溫都斯坦國亦與兵謀奪霍集占兄弟大軍又壓境檄索素爾坦沙乃遷霍集占兄弟於密室以二百人圍殪之而馳獻其馘率所部十萬戶及鄰部博羅爾三萬戶俱納款

西域聞見錄稱拔達克山誅霍集占盡有其帑賄鄰部退木爾沙與師而滅之赦罕又滅退木爾沙考聞見錄作于乾隆四十二年而四裔考官書載至乾隆五十年止尚稱巴達克山職貢不絕并無破滅之事蓋溫都斯坦欲攻巴達克山既而溫都為愛烏罕所滅聞見錄傳聞失實歟又以愛烏罕之哈默特沙汗誤為退木爾沙國故聞見錄無愛烏罕國名凡此錄

于葱嶺以西各國道聽塗說二十五五年遣使入朝貢刀斧說十譌六七不可依據

及八駿馬自是職貢不絕漢書皮山國在于闐西西南至烏秣國千有三百餘里今自和闐至巴達克山亦千三百餘里其國治葱嶺南四面皆山河抱城東兩崖有懸度之險唐書謂之竭盤陀國去疏勒西南六百里治葱嶺負徙多河即古之烏秣今之巴達克山矣

愛烏罕在巴達克山之西亦大回國也有三大城曰喀賓曰堪達哈曰默沙特其喀賓城三面皆山堪達哈城四面依山其汗所都默特沙城舊屬伊蘭部為愛烏罕所并遂兼治三大城每城相距皆二十餘程地廣數千

聖正言 卷四
里北界布噶爾南界溫都斯坦東界巴達克山勝兵十
有五萬惟火銃刀子無弓矢重農粟鮮物采商旅罕
至自兼并溫都斯坦後于是金絲之緞工鏤之玉奄豎
傳令聲明文物出諸國上初乾隆廿四年霍集占爲王
師所敗假道巴達克山赴愛烏罕巴達克山中道邀而
殺之愛烏罕及溫都斯坦各與師問罪巴達克山汗懼
乃貽之文綺具言霍集占負中國及擾已國之罪愛烏
罕遂與連和合兵拒溫都斯坦愛烏罕汗亦聞中國之
盛未知其道里遠近遂遣使偕來欲以覘中國廣大二
十七年入貢爲中國同疆最西之屬國于古爲大月氏
境再西爲默克等部卽回教祖國中隔沙漠過此卽海
南有思布部落過此亦海皆安息條支境域然其海皆
西人所謂地中海非大西洋之海也其克什彌爾之屬
爲古罽賓等國惟通市不貢者不悉言

臣源曰新疆南北二路外夷環峙然其毗鄰錯壤作我
屏衛者惟哈薩克布魯特兩部落而已哈薩克三部
有汗王公台吉世襲以理其游牧三歲一貢歲
一市以馬羊易緞布而稅其百一布魯特亦如之歲遣
領隊大臣巡視貪市畏威易於羈馭此外巴達克山距
葉爾羌二十五驛愛烏罕距葉爾羌四十驛克什彌爾

距葉爾羌五十一驛温都斯坦距葉爾羌九十四驛皆
 西隔慈嶺無係邊防雖敖罕部之安集延商賈徧於南北
 諸城貪貿易無他慮且距葉爾羌亦二十餘驛敖罕
 境狹人稀外之不及布噶爾什二內之僅當阿克蘇一
 隅其繁庶惟安集延一區不盡爲所屬見新疆識畧松
 筠奏回疆事宜
 道光二十二年敖罕遂爲布噶爾所滅虜其酋長頭
 目遣使告捷於卡倫布噶爾者距葉爾羌四十驛其地
 西北界俄羅斯南界愛烏罕東界敖罕及布魯特富強
 數千里統轄數百部不尙回教亦古聲教兵力所不至
 乾隆以來惟通市不列朝貢既并敖罕始接邊陲卽西

域聞見錄所謂塞克國云此外通市之部見於新疆識
 畧者尚有吐葉爾羌十三站
 之瓦罕之綽禪之赫斯圖濟距葉爾羌十五站之沙克
 拉之什克南之羅善之乾竿特距葉爾羌十八站之達
 爾瓦斯之窩什距葉爾羌二十四站之哈普隆之馬爾噶浪之依色克
 距爾羌二十三站之科拉普之三十三站之塔爾罕距葉爾羌
 距葉爾羌二十七站之噶斯尼六十站之坎達哈爾六
 斯之鄂勒推帕三十七站之濟雜克之拜爾哈三十九
 站之圖伯特五十五站之附庸部落不足比數至敖罕與温都
 又或卽各大國之附庸部落不足比數至敖罕與温都
 斯坦南北相距數千里中隔巴達克山克什彌爾各國
 而西域見聞錄謂敖罕與温都毘連與所述控噶爾及
 退木爾沙
 同一荒謬

乾隆新疆後事記

西域戡定西師亦蕨而與前事波瀾相首尾者北路則有土爾扈特之來歸南路安西路則有烏什昌吉之變亂土爾扈特者故厄魯特四部之一也其游牧地曰雅爾卽塔爾巴哈台在伊犁之北科布多之西南接鄂羅斯其通中國自康熙中之阿玉奇汗始阿玉奇之曾祖和鄂勒於明季國初爲鄰部所偏率其子書岱青等投鄂羅斯其舊游牧之雅爾地則輝特部居之故厄魯特仍爲四部阿玉奇旣長仍回舊部嗣爲汗以女妻策妄策妄則離間其子散札布台吉使率所屬萬五千戶至伊犁盡

聖祖欲悉其要領遣職方郎中圖禮琛由鄂羅斯報之
逾三載始反鄂羅斯者北方大國東界黑龍江包蒙古
喀爾喀哈薩克直抵大西洋袤二萬餘里土爾扈特自
明季國初越哈薩克而往投之俄羅斯城郭國也以土
爾扈特故行國亦給以邊地額濟勒河使游牧有騰吉
思巨澤所謂裹海也在圖理雅部之東俄羅斯之南左
哈薩克部之北夾河兩岸廣莫饒水草傳至阿玉奇之
孫烏錫巴皆以河南岸爲王庭而居其台吉鄂托克等

于河北休養生息百餘載兩岸各十餘萬戶墮幕駝馬
雲屯谷量乾隆二十二年王師大掃伊犁其各部厄
魯特之逸入鄂羅斯者悉安置于烏錫巴部下是爲新
土爾扈特康熙中俄羅斯之察罕汗曾徵土爾扈特兵
攻西費雅國土爾扈兵不習戰多受創至是叩肯汗攻
圖理雅國復徵之士爾扈特兵屢屐死傷萬計正當王
師定伊犁之後土爾扈特方苦于征役而其族台吉舍
楞者又新叛中國自伊犁竄往投之盛言伊犁空虛可
據狀其四衛拉新投之人同詞附和勸還故土烏錫巴
惑其言與其台吉刺麻集議傳諭大小宰桑各戒嚴約

北岸部落于河冰合時同渡東徙適冬煖河久未凍烏錫巴不能待遂率南岸十六萬口啟行沿途破鄂羅斯邊城四鄂羅斯興兵追之已出境將假道哈薩克哈薩克傾國力戰拒之改道布魯特布魯特千百爲羣環攻其輜重牲畜如陸網之待獸土爾扈特進退無路不得已改道各國邊界戈壁之地絕水草旬日皆飲牛馬血而行人畜死亡大半自十一月至六月始及伊犁卡倫僅存七萬餘口虺羸無人形伊犁將軍舒赫德嚴兵備邊遣人迎詰之烏錫巴與其台吉等計議數日始以慕化歸附爲詞言鄂羅斯持教衣冠俱不同願依中國興

黃教之地以安部衆奏聞廷臣議者以降人中有舍楞前曾誑害我副都統唐喀祿逃俄羅斯今來歸疑有姦計且我受鄂羅斯叛藩恐啟釁 高宗以舍楞前竄

時我固再檄索之而鄂羅斯不與是我理直有詞土爾扈特旣背其上國而來僮復于我中國彼將焉往且求生而致死之不仁急之必鋌而走險不智于是受其降召其酋長入覲熱河封烏錫巴爲汗其弟親王餘郡王貝勒公台吉有差分新舊二部各設札薩克給官牧之馬牛羊十有四萬而新疆市往之十二萬頭尙不與撥官茶二萬餘封出屯庾米麥四萬餘石而伊犁贍賑之

茶米不與甘肅邊內外購羊裘五萬餘襲布六萬餘匹
棉六萬餘斤。羶廬四百餘架而庫給之。羶棉不與共。靡
帑金二十萬有奇。郵傳供億。燕享犒賚。使者勞來相望。
一如康熙中撫喀爾喀四部例。降夷息喘如歸。獻西洋
鐘表火鎗及所受明玉印。乃賜哈拉沙地爲其游牧。以
著勒土斯上爲王庭。開都河兩岸廣沃可耕可牧。如其
故地而鄂羅斯方西向。構兵不暇。東問收其故地。馬行
東西三十日。南北二十日。改建他藩部。仍與我通市。如
初。于是四喀爾喀部與四瓦刺部之衆皆撫而有之。疆
域幾埒元代矣。二十九年而有回疆烏什之變。烏什在

庫車西北千里。戶口數萬。亦回疆一大都會也。準噶爾
敗其阿奇木伯克霍吉斯。俘達瓦齊以獻。受王封。及二
和卓之亂。霍吉斯頗持兩端。上恐其反覆不可專

任。召入京。而以哈密伯克阿布都拉代之。阿布都拉暴
戾無親。其屬役之哈密回子。又助其魚肉。勒買布糧。馬
羊壯則攘之。而以羸者倍值售之。辦事大臣蘇成素。慣
慣不治事。又酗酒宣淫。甚至留各伯克妻子署。而令兵
役裸逐爲樂。喜磨怒狠。民無所訴。二月解送沙棗樹。苛
派回戶二百四十人。相聚謀變。一回奔告阿布都拉。阿
布都拉叱逐之。西城回戶不願從亂。相率走投。駐劄大

皇正言 卷四
臣署亦叱拒不納是夕亂作阿布都拉蘇成及兵役皆
殲焉時乾隆二十九年二月也阿克蘇辦事大臣卞塔
海一作邊他哈聞變卽領兵五百赴烏什烏什開城出迎卞
塔海卽令舉銃城復閉逾二日又以礮攻城時城中反
者不過四百餘皆閉戶不預聞及是則迫脅羣起共聽
阿喇木圖喇號令悉衆馬步二千餘出戰卞塔海敗走又
敗庫車大臣鄂寶之兵喀什噶爾參贊大臣納世通伊
犁將軍明瑞參贊永貴各以兵赴援會圍烏什事聞卞
塔海以誤軍機伏法納世通亦以騷擾罪誅官軍晝夜
攻城賊遣其黨潛煽各回城並乞援于敖罕布魯特遠

近洵沸會葉爾羌阿奇木伯克鄂對之妻葉依木隨其
子鄂斯滿在庫車聞之五晝夜馳至葉爾羌置酒盡召
諸阿渾愛曼責以大詣利害復使歌舞之回女勸侑盡
醉而陰遣人赴收其兵器又盡縱其馬驅牧百里外山
澤人心始定其子鄂斯滿自庫車引回兵赴烏什庫車
城中羣不逞之徒亦思爲亂伯克阿那雅爾日率衆伯
克集大臣署前二更始散阿克蘇回酋色提巴爾才入
覲京師至肅州聞警七晝夜馳還阿克蘇城中乃不
敢動而賊所遣赴敖罕之巴敦布復爲布魯特執獻于
是賊外援絕我兵又斷其樵牧敗其衝突而賊首猶劫

其衆不許出降城南倚山面河自河至城茂林橫翳隔河礮不能及也自五月至七月攻城未克賊一夕忽盡伐之城池豁露我兵四薄賊內潰盡縛首逆以降官兵入城殲其黨羽徙老弱萬餘口戍伊犁烏什平奏善後章程一阿奇木之權宜分一格納坦之私派宜革一回人之差役宜均一都官伯克之補用宜公一伯克等之僕使宜節一賦役之定額宜明一民回之居處宜別一伯克等與官員相見之儀宜定又移參贊大臣于此徙各城回戶以實之越三年而復有昌吉之事昌吉者王師定準部後大興屯田處也設直隸迪化州于烏魯

木齊轄阜康昌吉綏來三縣除兵民回屯外復有內地
謫戍之屯戶是爲流屯乾隆三十有二年屯官以中秋
之夕犒諸流人置酒山坡男女雜坐醉偏流婦使謳諸
流人故悍又皆使酒俄頃激變戕屯官劫軍器據城叛
黎明報至烏魯木齊時班兵散在諸屯城中兵僅百有
五十然皆百戰之餘視賊蔑如也鎮守都統溫福卽率
之以行至洪山口守備劉德叩馬曰此去昌吉九十里
我馳一日至城下是賊以佚待勞且其城非百餘人所
能仰攻破也賊得城必不株守勢必來不如扼險待之
兩崖隱蔽賊莫測我多寡是反客爲主反攻爲守破賊

聖代已
卷四
四

必矣。遂止營。賊果至。德令于衆曰：望其塵氛，雖不過千，然皆亡命必死之賊。幸所乘皆屯馬，未經戰陣，受創必反走。我軍各擎鎗伏以待視。旗動而擊之，敢先者斬。俄而賊鎗競發，我軍不動。忽前隊一人傷，德麾衆鎗齊發，賊馬果皆橫逸，譟而乘之，皆反奔。追北至瑪納斯河，其地南界天山，北瀕葦湖，賊趨絕地，遂爲官兵所殲。其後詔書屢舉二役爲鎮守回疆諸臣之大戒。

道光重定回疆記

回疆自乾隆二十年戡定後，各城設辦事領隊大臣，而統于喀什噶爾參贊大臣，並受北路伊犁將軍節制。歲征錢糧土貢，數十分取一視。當日準夷之虐，取兩和卓木之騷動，不啻蓰倍。兼以蘇成激變，高樸敗檢之後，宗室侍衛騷擾荷校之餘。朝廷常慎選邊臣，皆保舉之滿員，與左遷之大吏。回戶賴其休息，仰朝使如天人。及其久也，保舉漸弛，多用侍衛及口外駐防視換防爲利藪。以瓜期爲傳舍，與所屬司員章京服食日用無一不取于阿奇木伯克。伯克藉供官爲名，斂派回戶日增。

月甚西域赤銅普爾錢一當內地之五喀什噶爾歲斂普爾錢八九千緡葉爾羌歲斂普爾錢萬餘緡和闐歲斂普爾錢四五千緡又土產璫裘金玉緞布賦外之賦需索稱是皆章京伯克分肥而以十之二奉辦事大臣各城大臣不相統屬又距伊犁將軍寫遠恃無稽察威福自出口外駐防筆帖式更習情形工搜括甚至廣漁回女更番入直奴使獸畜而回民始怨矣屬夷各布魯特久爲近塞藩籬自嘉慶十九年孜牙墩之案枉誅圖爾第邁莫特其子阿仔霍逃出塞外憤煽種類名圖報復繼以蘇蘭奇汰列克之事而布魯特亦怨矣張格

爾者故回酋大和卓博羅尼都之裔也博羅尼都當乾隆初以叛伏誅其子薩木克自拔克達山逃匿赦罕有三子次卽張格爾以誦經祈福傳食部落奸回假餽和卓之名斂財煽衆時有譌言嘉慶二十五年南路參贊大臣斌靜荒淫失回衆心八月張格爾始糾布魯特數百寇邊有頭目蘇蘭奇入報爲章京綏善叱逐蘇蘭奇憤走出塞從賊領隊大臣色普徵額率兵敗之張格爾僅餘二三十賊舍騎步逃次日官兵追及塞外遺炊尙然竟回軍喀城與斌靜宴中秋節所禽百餘賊斌靜悉誅以減口
上以斌靜獲賊不訊明覺由蒙隱具奏

疑之。特命伊犁將軍慶祥往勘。得回民所控。斌靜
縱家奴司員凌辱伯克。交通姦利。諸罪奏聞。褫逮道光
二年。以永芹代之。芹亦未能撫馭。四年秋。五年夏。張格
爾屢糾布魯特數百。騷掠近邊。且詭降。要求叵測。時內
地回戶多為其耳目。官兵往捕。輒遁。九月。領隊大臣巴
彥圖以兵二百出塞。四百里。拏之。不遇。即縱殺游牧之
布魯特妻子百餘而還。無復行列。其酋汰列克恨甚。率
所部二千。追覆官兵于山谷。賊遂猖獗。十月。詔以
慶祥代永芹參贊。以大學士長齡代慶祥。奸回阿布都
拉者。慶祥之腹心也。陰為賊耳目。堅稱逆裔。無子

慶祥信之。奏劾阿奇木王努斯。妄報逆裔。有子之
罪。六年夏六月。張格爾率安集延布魯特五百餘。由開
齊山路。突至回城。拜其先和卓木之墓。回人所謂瑪雜
也。距喀城八十餘里。慶祥令協辦大臣舒爾哈善領隊
大臣烏凌阿以兵千餘剿之。殺賊四百。賊退入大瑪雜
內。牆垣三重。周五里。官兵攻之。突圍出。各回響應。旬日
萬計。慶祥盡調各營卡兵。還喀城為三營。令烏凌阿穆
克登布分將之。迎戰渾河。先後歿于陣。官兵隔于賊。不
得入城。東走阿克蘇者七百人。此據方略也。詢之軍中
人。則云此七百人者。副
將周某某。四川人。率之築壘城外。回賊圍城。則外兵攻
其後。與城中犄角力戰。七晝夜。鉛硝盡。死之。未知孰是。

但此時四城全叛此七百人何由得達阿克蘇若死初
 戰則副將應優蒙郵典皆于方略無考故存疑于此初
 回疆惟敖罕驚悍善戰有百回兵不如一安集延之語
 張格爾恐伊犁北路援兵速集遣使求助于敖罕約四
 城破子女玉帛共之且割喀城酬勞七月敖罕酋自將
 安集延萬人至則張格爾已探喀城無援悔背前約敖
 罕酋怒即自督所部攻城城不下又恐回人背之腹背
 受敵率兵宵遁張格爾使人追陷其眾復歸投者二三
 千張格爾置為親兵八月二十日喀城遂陷英吉爾沙
 集爾羌和闐三城繼之 命署陝甘總督楊遇春以
 欽差大臣統陝甘兵五千餘馳赴哈密會諸軍進剿以

陝西巡撫鄂山署總督又以署陝西巡撫盧坤赴肅州
 理餉七月伊犁將軍長齡奏言逆酋已踞巢穴全局蠢
 動喀城距阿克蘇二千里四面回村中多戈壁斷非伊
 犁烏魯木齊六千援兵所能克復惟有速發大兵四萬
 以萬五千分護糧臺以二萬五千進戰 詔授長齡
 揚威將軍以將軍德英阿代鎮伊犁又 命山東巡
 撫武隆阿率吉林黑龍江二千騎出關與楊遇春均參
 贊會阿克蘇進剿原任伊犁將軍大學士松筠請赴回
 疆招撫又土爾扈特蒙古備兵請赴援 上嘉之皆
 不許八月 勅長齡察歷任回疆參贊辦事領隊各

聖訓 卷四
臣貪淫虐激回民之罪。斌靜色普徵額均下獄。擬大辟。巴彥圖濫殺債事。追奪卹典。章京綏善戍黑龍江。禡前參贊松福之職。特頒手諭十條。指授方略。又詔以

乾隆間創拓新疆。故用出征外域之例。嘉慶初川陝楚軍需未定章程。故多糜費。今回疆隸版圖六十餘年。城堡臺站悉同內地。不得復藉詞險遠。其令總理糧餉大臣定則例。繪圖說。備稽核。又以肅州嘉峪關距阿克蘇五千餘里。僅于哈密總設糧臺。鞭長莫及。其運烏魯木齊所積屯糧。及伊犁采買之糧。赴阿克蘇省內地轉輸大半。其內地軍械火藥。改由烏魯木齊北路逾冰嶺

轉阿克蘇。視吐魯番庫車南路水草較便。并開新疆銅山鑄普爾錢。又撥烏里雅蘇臺伊犁等孳生牧廠牛駝各數千馬二萬。及蒙古汗王公所進駝三千。備用時伊犁之川楚客民及流犯內。多有會充鄉勇。練行陣者。奏選二千從征。時賊已陷西四城。盡戕兵民。燬解舍。浸及渾巴什河。距阿克蘇八十里。烏什庫車戒嚴。阿克蘇辦事大臣長清遣參將王鴻儀領兵六百拒賊于都齊特戰。沒賊偪渾巴什河。距阿克蘇四十里。城中兵不盈千。乃復分兵二百扼河拒之。八月葉爾羌回賊五六千將渡河。官兵先撥剿北岸附賊。時達凌阿自庫車巴哈

布自哈拉沙先後來援並分兵援烏什敗其渡河之賊禽斬三百賊復分隊宵渡上游偏城二十餘里長精遣百十騎騁沙揚塵鼓譟東至賊退走南岸我軍亦渡河爲營賊再攻再敗禽斬千百自後不敢窺河北東四城始無恐十月大兵集阿克蘇者萬餘時賊三千扼柯爾坪距阿克蘇三百里爲進兵要道山路嶮險中隔戈壁長齡使提督楊芳襲破之而和闐伯克伊敏等亦聚其衆二千縛獻僞帥及和闐大臣舊印蓋黑帽回非霍集占支派張格爾縱白帽回虐脅之故阿克蘇阿奇木曰伊薩克者遣其黨分赴和闐離間黑回各伯克獻城內

附會冬雪封山兵未能進復爲白回所陷七年春長齡等奏言前奉 詔令大兵分奇正二路以正兵由中路臺站進而奇兵由烏什草地遶出喀城斷其竄遁惟是烏什卡倫外直抵巴爾昌山溝險狹戈壁數百里所經布魯特部落半爲賊煽未可孤軍深入且官兵畱防阿克蘇四千烏什四千庫車五百餘并未到之延綏四川兵五千外其進剿之步騎共止二萬二千如兩路分進相去二十餘站聲息不通且喀城蠶屯醜衆不下數十萬衆煦漂山非大兵全力中路直搗喀城反正爲奇難期萬全無失惟喀城邊接外夷凡十七卡恐賊敗遁

聖武記 卷四
已潛諭黑回赴喀約衆邀截二月六日出師十四日至巴爾楚軍臺喀葉兩城分道處也復畱兵三千以防南路繞襲之賊二十有二日至大河拐時我軍深入半月未見賊已糧盡日食疲駝羸馬惟恐賊堅壁清野不戰而困我也爭望殺賊因糧是夜始敗其襲營之賊三千次日賊決河灌道多掘溝坎我師戈壁中轉得水以濟士馬午抵洋阿巴特沙漠平曠賊二萬據橫岡五六里長齡楊遇春將中軍武隆阿左楊芳右三路進攻賊據岡下壓者再 大兵分路奪岡賊披靡半遁回莊半西竄官軍分路禽斬其半盡得牲畜糗糧濟師士氣百倍

二十有五日至沙布都爾岡城多葦湖樹林賊數萬臨渠橫列決水成沮淤騎難馳騁城後林中各有伏賊難繞襲我軍乃先令步卒冒險越渠短兵鏖戰復麾騎兵繞左右淺渠橫截入陣適賊營火藥自轟我軍乘之射殪賊帥奪旗鼓衆始潰敗追逾渾水河三十餘里禽斬萬計復分敗林中伏賊及河橋援應之賊時河北左山右水路狹箐深恐有伏乃議畱兵扼橋而循河南上二十有七日賊數萬據阿瓦巴特回城依岡背河官軍未至五十里見牛羊蔽野又探騎數百見軍卽反走我師悉賊誘也嚴令勿掠亦勿追距賊十里而止營夜遣吉

林勁騎各五百分探左右間道繞出賊後次日壓賊壘而軍川陝步兵居中騎兵張左右翼進賊伴退欲誘我兵登岡而反乘之我兵槍礮迭前而藤牌兵虎衣躍入賊馬驚陣亂岡後伏賊援應死戰而我千騎已繞出回堡後突擊其背賊大潰斬禽各半復殪安集延二帥追至洋達瑪河距喀城八十里次日整隊至渾河北岸距喀城十餘里賊悉其衆十餘萬背城一戰阻河列陣亘二十餘里築橫壘蔽之穴壘列銃鼓角震天勢張甚我軍復遣死士數百夜擾其營謹黨達旦夜二鼓西南風起撼木揚沙大霧晦長齡以賊據形勢偏咫尺且衆寡

不敵恐昏晦乘我四面受敵欲退營十餘里遠賊須霽而進楊遇春不可曰天贊我也霧晦中賊不辨我多少又不虞我卽渡時不可失且客兵利速戰難持久乃遣索倫千騎繞趨下游牽賊勢而自率親兵驟渡上游據上風前鋒先扛礮轟賊礮勢與風沙勢相并若百十萬兵摧壓驟至賊陣亂比曉我兵盡渡風止霧霽乘勢衝入賊陣賊土崩回俗高履跼蹙不良于行且各裹糗餼負戴累重及敗遁橐臬徧地又喀城大礮尙未運至軍軍衆而無調度不知襲伏犄角之術惟知并歸一隊故

聖正言 卷四
爲我破我軍乘勝抵喀什噶爾時三月朔也楊遇春欲急追之張格爾已先遁官兵先據漢城次破回城僅獲其甥姪及安集延僞帥推立汗薩木汗並從逆伯克等先後殺賊無算生禽四千餘奏聞 上以命將出師期殲元惡乃臨巢鬼脫棄前功畱後患長齡奪紫疆楊遇春武隆阿奪太子太保少保銜仍勒限獲賊時武隆阿病畱喀什城三月五日楊遇春率師復英吉沙十六日復葉爾羌又使楊芳以兵六千餘往剿和闐賊亦同日破賊五千城外禽斬玉努斯遂復和闐初張格爾重啗安集延爲

才學入回城破安集延不惟盡得府庫官私之財并接括回戶殆徧張格爾又昏憤濫誅殺回人大失望及張格爾走浩罕浩罕亦不受也六月長齡令楊遇春楊芳率兵八千出塞揜捕並諭各部落禽獻楊芳屯阿賴楊遇春屯色勒庫南北相去十餘站阿賴者葱嶺之脊脊以西水皆西流乃喀什赴浩罕之道也時出塞官兵八千畱喀什城兵九千浩罕布魯特各部落雖各有禽獻之言賊愈遁愈遠終無要領軍懸絕徼道遠餉艱而楊芳在阿賴遇浩罕二千餘賊誘官兵入伏鏖戰一晝夜軍幾

聖正言 卷四
貽步步爲營嚴陣出險。上責諸將孤軍深入。老師糜餉命畱官兵八千防喀城其餘兵九千卽隨楊遇春入關以楊芳代參贊初大軍之西征也。密奉手諭以事平之後西四城可否仿土司分封之例令將軍參贊籌議長齡以張逆未獲奏言愚回崇信和卓猶西番崇信達賴刺麻已成不可移之錮習卽使張逆就禽尙有其兄弟之子在浩罕終畱後患勢難以八千畱防之兵制百萬犬羊之衆若分封伯克令其自守則如伊薩克玉素普等助順官兵均非白回所心服之人惟有赦故回

酉博羅尼都之子阿布都里乾隆中羈在京師者令歸總轄西四城庶可以服內夷制外患武隆阿亦奏言善後之策畱兵少則不敷載守畱兵多則難繼度支前此大兵進剿賊卽有外襲烏什內由和闐直驅阿克蘇之謀幸克捷迅速奸謀始息臣以爲西四城各塞環偏外夷處處受敵地不足守人不足臣非如東四城爲中路必不可少之保障與其靡有用兵餉于無用之地不若歸并東四城不須西四城兵費之半卽鞏若金甌似無需戩守西四城漏卮。上切責長齡老悖昏繆欲釋逆裔歸長舊部與武隆阿均革職畱任九月。命直

隸總督那彥成以欽差大臣赴回疆代長齡籌善後時
張格爾傳食諸部落諸部落漸不能供生計日蹙時中
國購禽獻張格爾者爵郡王金十萬十二月長齡等密
遣黑回出卡縱反間言官兵全撤喀城空虛諸回翹首
以望和卓其白回從賊出卡者家室皆令無恙以離其
心張格爾果復率步騎五百欲乘官兵除歲不備入卡
煽眾潛襲喀城長齡楊芳嚴兵六千以待二十有七日
賊由開齊山舊路潛入阿木古回城白回奔竄黑回要
拒賊知有變卽折奔出卡楊芳率兵三路星夜追至喀
爾鐵蓋山擊斬殆盡張格爾僅餘三十賊棄騎登山副

將胡超都司段永福等禽之八年正月捷聞

詔封

長齡二等威勇公楊芳三等果勇侯均賞戴雙眼花翎
翎阿克蘇貝子伊薩克晉封郡王其餘將士胡超以下
賞賚有差是月楊遇春至京實授陝甘總督加恩東四

城守禦諸臣贈卹西四城殉節諸臣

恭上

皇太后徽號勒碑太學及喀爾鐵蓋山郊勞受俘舉行
如典凡內地剿賊不獻俘惟外夷獻俘故惟康熙雍正
乾隆舉行而嘉慶中無之是役用兵三萬六千有奇用
帑銀千餘萬兩初恐賊深溝高壘而遣偏師繞出我東
路斷餉道也故多畱兵嚴防後路實抵喀城兵不及二

萬其川陝未至之兵有中途返者初張格爾就禽長齡檄諭浩罕布噶爾縛獻逆裔家屬浩罕遣使來賀言被虜兵民可以獻出惟回人經典無獻和卓子孫之例而我喀城叛弁譚祿者先踰城降張格爾後復降浩罕爲奸細嚮導教其要挾又設伏攻官軍于阿賴旋同浩罕使至發覺磔死 上以逆孽么麼無關邊患 敕

那彥成楊芳等嚴守卡倫禁其貿易俟夷計窮蹙自將縛獻求市毋煩檄索旋 召那彥成來京那彥成以

逆子布素普年六歲尙在浩罕及助逆之阿坦台汰列克等未獲屢遣間購致並招諭布噶爾巴達克山達爾

瓦斯各部落使與浩罕攜貳

上敕那彥成毋貪功

生覺令于九年六月回京于是那彥成先後奏章程數十大略嚴革各城積弊俾各大臣歲終考核于都統參贊又總考核于伊犁將軍互相糾察並增其廉俸許其攜眷定其役使而印房章京俱由京揀派不用駐防以重其選尤嚴賄補伯克之弊定其資格慎其保舉制其迴避其五城叛回地產歸官收租歲糧五萬六千餘石支五城兵餉三萬八千餘石外餘糧萬八千石而喀城之大河沿葉爾羌之亮噶爾新墾尙不在內皆爲酌增各官養廉鹽菜銀之用有餘則變價解阿克蘇采買儲

倉兼改城垣增卡堡練戍兵以漸裁撤此安內之法也至外夷爲逋逃藪者莫如浩罕所屬不過八城安集延卽其八回城之一在浩罕東三百八十里距喀城五百里自閉關罷市後用度不支四面布魯特皆其仇敵一離巢穴卽憂外寇其藏畱逆裔不過以繫白回之心惟嚴禁茶葉大黃出卡以窘其生計盡逐內地流夷以斷其耳目收撫各布魯特以翦其羽翼待其款關求貢而後撫而用之此制外之法也悉允行暨道光九年秋安集延流寓各夷被逐出卡憤怨報復官兵敗績卡外賊衆萬餘攻圍喀什噶爾葉爾羌焚掠回莊那彥成之子

容安以伊犁參贊大臣領兵赴援軍抵阿克蘇畏賊不敢進繞道烏什致賊飽颺出卡逮下獄擬重辟那彥成亦革職長齡以欽差大臣同楊芳哈朗阿馳至軍檄諭浩罕復許入貢通市喀什噶爾參贊大臣駐葉爾羌道光二十二年叛亂竟滅于布噶爾

臣源曰乾隆二十三年戡定新疆經畫善後之計北路詳于南路故屯田二十八萬餘畝而南路不及五分之一其官兵則北路駐防而南路僅換防商民則北路挈眷而南路不得挈眷夫固畛域視之矣若捐西守東之議固王者不勤遠略然東四城膏腴不及西四城什之

聖正言 卷四
二卽北路伊犁亦不及焉苟捐畀土酋必互相吞并自相雄長易世後且挾其富庶倔强以與我難如大小和卓之已事不然則爲布魯特侵據邊圉其能晏然已乎誠使仿伊犁烏魯木齊移眷駐防之例以回疆戍兵改爲額兵屯田裕餉並許內地商民挈家墾種以漸升科計喀城葉城以東兩河沿岸原隰膏沃各數百里有準夷溝渠遺跡可各得萬餘頃漚緩渠平決漑反掌蒔插輒穫畝收數鍾鹵莽爲之事半功倍不數年兵民愈衍愈熾外足以控制回戶內足以分中國生齒之蕃利可殫述哉今回疆各城官吏已許挈眷而戍卒商民駐屯

之例尙未推廣夫家室不成則生聚不盛人心不固墾闢不富且北路南路皆國家疆以戎索之地何必一輪臺一甌脫 上又以南北兩路相輔車而道里迂遠命查冰嶺以西可通烏什之路那彥成德英阿等奏言自伊犁惠遠城至烏什十七站約千二百里俱有水草中隔數河石多水少人馬可行較冰嶺一路稍平惟中有七站屬布魯特游牧未便設驛是以自昔封禁止爲北路換防官兵往來捷徑而兵貴神速設遇緩急卽可由此間道長驅深入皆籌邊者所當攷并附著于篇

聖武記
卷四
三十一
關不富且北視南顧
之圖尚未詳觀夫

道光回疆善後記

道光七年冬

詔直隸總督那公以欽差大臣使回

疆明年正月張格爾就禽

詔楊威將軍長公凱旋

那公赴喀什噶爾籌善後是時今兩江總督蒙古璧公

以大名府知府隨行出關檄司總局先後詳奏章程敘

十凡級內攘外築城練兵通商稽卡一革百年積弊源

已撰其崖略入

聖武記九年三月

詔賞璧公

頭等侍衛署理葉爾羌辦事大臣竝賞戴孔雀翎其地

固公之先公舊任遺愛在回民而再造創始又時有

變通出原奏之外如葉爾羌清出私墾地畝新疆萬九

千四百餘石改徵折色撥補阿克蘇烏什喀喇沙俸餉
餘留充葉城經費而以目下存倉二萬石定爲額貯按
歲出陳易新毋庸解赴東四城于是葉爾羌倉庫兩足
其西抵英吉爾沙中隔之戈壁百四十里相地改驛開
渠水種苜蓿士馬大便又以其暇訪回民之疾苦聯伯
克之耳目一新壁壘衆志成城十年秋八月卽有浩罕
安集延入寇之事初張格爾伏誅後其妻子尙留浩罕
那公墩令縛獻不從 上命絕其互市以困之而那
公并奏驅歷年留商內地之安集延出卡且沒入其貲
諸夷商憤怨思報復探知大兵已班于是奉張逆之兄

玉素普爲和卓糾結布魯特安集延共數千謀入寇上
年春有客民高四首報五月回郡王伊薩克亦密報賊
警參贊大臣札隆阿皆不信且奏言南路如果有事惟
臣是問八月九日聞警始令幫辦大臣塔斯哈赴喀浪
圭禦之又令副將賴永貴以兵千六百赴明約洛夾剿
賊佯以少兵誘我入險而截其後路賊皆騎兵而我兵
多步少騎不能衝擊先後覆沒賊遂猖獗札隆阿奏聞
詔陝甘總督楊公遇春赴肅州參贊大臣哈朗阿
及楊公芳同馳赴阿克蘇調兵進剿時葉爾羌城中兵
僅六百壁公聞警盡徙城外商民于城內傳集各回伯

克諭以禍福利害。選派回兵分防各要隘。一爲西通喀
英二城之科熱巴特。一爲西南通色呼庫勒之亮噶爾。
一爲東通樹窩子之巴爾楚克。每路各守以兵勇二百
回兵一二千。部署甫定。而賊圍喀英二城。後卽分隊由
草湖來寇葉城。公選回兵千餘屯回漢二城中路。官兵
四百陣東門外。次日賊步騎萬餘來犯。我兵上下攻擊。
扛礮繼之。禽斬賊三百餘。又禽撲入回城之賊三百餘。
賊退走三百里外。僅陣亡我兵一人。回兵五人。是役回
漢一心以少破衆。全得阿奇木伯克阿布都滿助順之
力。皆公推誠駕馭所致。詔賞公副都統銜。餘將士

分別獎勵有差。而札隆阿在喀什噶爾亦督兵三次出
城擊賊。毀其礮臺。殺傷賊衆。時伊犁參贊大臣容安領
步騎四千五百于九月十二日抵阿克蘇。尙欲俟烏魯
木齊各路兵集而後進。于是葉爾羌賊復于二十日
兩路來犯。回兵迎戰二十里外。不利。官兵五百復迎剿
于十里外。卻之。又遣回兵擊退色呼庫勒之賊。時葉爾
羌境內布魯特安集延。聞援兵將至。皆先竄。惟餘上年
從逆逃往浩罕之朶蘭回子。脅惑各莊。朶蘭回子皆霍
衆賤類。白回不與婚姻。集占家奴爲回
分遣各城充當苦差者。朝脅暮散。不能成隊。故不敢攻
城。僅截路奪掠。每路數百人。但得官兵步騎二千。卽可

聖武記 卷四
掃廓道路以解喀城之圍而容安擁重兵八九千反繞道烏什趨無賊之和闐致喀英二城圍久不解各回城子女玉帛搜括殆盡葉城賊脅從復聚上震怒逮容安以哈豐阿代領其衆十月七日賊步騎千人犯葉爾羌壁公先決大河渠上游以斷賊近城之路自領兵民八百餘迎擊副將任貴邦先以扛礮擊卻涉水騎賊卽督兵直渡北岸殺賊三百餘賊奔潰十一月朔賊復聚攻城日夜相持初五日哈豐阿援兵三千五百至賊望風瓦解初六日哈豐阿等破賊步騎二千于哈拉布札什禽斬三百燒其敗匿回莊之賊五百餘十二日

遂進至英吉爾沙喀什噶爾賊已解圍飽颺出塞二十日胡超兵至旣而哈朗阿楊芳二參贊亦至欽差大學士長公行至葉爾羌以奉命與伊犁將軍玉公會審札隆阿伊薩克之案折回阿克蘇初賊之至喀什噶爾也官兵已大半沒塞外回城無官兵督守伯克回民奔入漢城而漢城商民復疑白回通賊內應聚衆搜殺二百餘適有自賊逃還之吉林布述賊言伊薩克內應札隆阿謂賊反間不足信而商民皆洶洶圍其署欲除之札隆阿使人衛出伊薩克一家送參贊署監守而撫慰兵民登城守禦及圍解札隆阿具奏始末并言

伊薩克久已通賊。參贊哈朗阿楊芳初至喀城，亦以所詢兵民之詞入奏。上疑之，故命長公玉公會

讞。究出主謀草奏之幕友周彭齡及羅織教供之通事等，奏上札隆阿擬斬監候，枷示阿克蘇兩月，而還伊薩克舊職。其葉爾羌伯克阿布都滿仍許襲其祖霍吉斯郡王之封。十一年，璧公調授喀什噶爾參贊大臣。是時浩罕聞官兵大至，將由伊犁烏什喀城三路出討。浩罕亦于二邊界築牆防拒，又遣使求貢俄羅斯，欲以乞援。俄羅斯以浩罕新構釁中國，拒其使，不許入境。浩罕既無外援，乃有求市意。上命長公玉公赴喀城召

楊芳回任。七月，長公抵喀城，則浩罕已遣三頭目來呈訴前事，並請通商。此外別無所請也。長公遣還其二使，留其一使，令縛獻賊目，釋回被虜兵民。兩月不報。十月，浩罕始遣還前同往之伯克歸報，言被虜兵民可以釋還，惟縛獻夷目之事，回經所無。且于通商外，要求免稅，并給還前所鈔沒貲產。較前次所求反奢。長公奏言安邊之策，振威爲上，羈縻次之。浩罕與布噶爾、達爾瓦斯、喀拉提錦諸部落，犬牙相錯，所屬塔什干、安集延等七處均無城池，其臨戰皆以騎賊衝陣，然不能于馬上施銳。倘遇連環鳥鎗，則騎賊先奔。又卡外布魯特、哈薩克

皆受其欺凌爭求內徙而卡內回衆亦俱恨其虜掠果欲聲罪致討但選精銳三四萬人整旅而出竝于伊犁烏什邊境聲稱三路竝進先期檄諭布噶爾等部同時進攻則不待直擣巢穴而其附近仇部已羣起乘釁四面受敵可一舉掃蕩惟是一出塞外主客殊形自喀浪圭卡倫至浩罕千六百餘里中有鐵列克嶺爲浩罕布魯克交界兩山夾河僅容單騎兩日方能出山此路最險不值勞師遠涉擬遣還前所留來使一人令伯克霍爾敦寄信開導爲相機羈縻之計上命一切如其所請浩罕大喜過望遣使來抱經盟誓通商納貢是冬

浩罕復以兵巡俄羅斯邊界張聲勢十一月奏請于喀城參贊署設善後局先是玉公長公均有善後密奏至是上復以中外諸臣條奏交兩公會議兩公以去冬葉爾守禦有效遂奏移參贊大臣于葉爾羌之策略曰此次入寇之賊與張格爾不同不過烏合夷衆挾驅逐鈔沒之憾虜掠取償竝無志于土地人民而各白回畏賊騷掠助順守禦亦非上年甘心從逆之比是此時戰緩而守急惟是兵未至而賊已先逃兵久駐而賊無一獲戰守俱無長策諸臣條奏如言增兵廣屯自爲耕戰以省徵調言之似易行之寔難卽收效亦在數十

年之後。至仿土司以西四城付阿奇木伯克。則回性懦弱。非浩罕敵。若無官兵守禦。賊至必如入無人之境。臣等再四商籌。統兵之人宜立于不敗之地。斯能制人而不爲人制。惟有移參贊大臣于葉爾羌。其地本回疆都會。距喀什噶爾六站。在不遠不近之間。再移和闐領隊大臣一員。以備調遣。其喀什噶爾留換總兵一員。與喚吉爾沙領隊大臣犄角。再于葉爾羌阿克蘇適中之巴爾楚克。駐守總兵一員。以爲樹窩子咽喉鎖鑰。則六城相距。均不過數百里。聲勢聯絡。其防兵之數。請于西四城六千額兵之外。再酌留伊犁騎兵三千。陝甘綠營兵

四千。計新舊兵額萬有二千。除阿克蘇烏什各有兵千餘。毋庸議增外。喀什噶爾擬駐綠營兵三千。哨探前敵。英吉沙爾駐步騎千有五百。爲喀葉二城中權接應。巴爾楚克擬駐綠營兵三千。築堡駐守。使賊不能遶截後路。和闐僻在一隅。止需駐兵五百。此外滿兵二千。漢兵四千。全駐葉爾羌。隨參贊大臣居中調度。小賊各城自剿。大賊參贊相機遣援。無煩由內地徵調。如賊敢深入。以主待客。前後夾攻。必可一痛創之。無後患。即可酌減新兵。以復舊制。其新兵糧餉。應請于各省綠營兵額內酌裁百分之二。可歲省銀三十餘萬。以爲回疆兵餉。俟

屯田興舉有效地利日增生聚日盛兵民日固即可以
回疆兵食守回疆仍撤還內地餉額奏上得旨允

行初上年長公密奏請移參贊于喀什沙爾其地距喀什
什噶爾東西四千餘里有事鞭長莫及且賊未受創
而即退守適以示弱故是冬長公回京玉公回伊
上未允行至是始自改前議

穆璧公以參贊大臣移駐葉爾羌初回俗皆無城乾隆
初定新疆于回莊旁築牆及后名曰漢城僅容官署兵

房倉庫而已其商民街市均在漢城之外或雜處回房
故六年之變四城易失及八年善後重建漢城始與回

莊隔別然惟喀什噶爾新城璧公所督築並包坊市于
城內其英吉爾沙和闐葉爾羌三城則督修者惟計兵

數仍居商民于城外十年璧公守葉城急移商民貨物
入城而燬城外市舍及再籌善後擬築關牆以包坊市

工未舉即奉命入都常以為憾然浩罕自通市後
見我邊防整飭貪利畏威亦至今無反側

魏源曰那公長公兩籌回疆善後皆璧公總司其局人
但知公守禦葉城之功而不知其全局經營至大且密

且遠也公常曰回疆之吏職稱司牧回羊也浩罕狼也
布魯特保我藩離譬則犬也六年十年浩罕再犯塞飽

食羊羣狼多犬少犬亦隨狼食羊故其吠聲亦不足信
今日而欲以夷制夷不在知已知彼哉浩罕部本微也

聖正言 卷四 三
土產甚貧全賴諸夷入卡貨物過境抽稅其西有倭羅
堆牌部地險人悍世仇構兵逮八年浩罕吞并倭羅堆
牌無內顧憂故十年遂東犯邊然其西又有布噶爾國
環之尤大且強挾浩罕酋之弟以女妻之旦夕伺釁及
道光二十二年浩罕遂爲布噶爾所滅虜其王子伯克
來告捷蓋乘其內亂而助弟滅兄今浩罕遂爲布噶爾
附庸則知前此跳梁于卡外者外強中乾也援兵初集
之始浩罕遣使求貢于俄羅斯俄羅斯拒之及通商免
稅還產還貨盡獲所求始復以兵巡俄羅斯邊界夸示
于我亦外強中乾也十年入卡擁張逆之兄玉素普以
煽惑白回玉素普誦經慈善見浩罕荼毒回衆深悔其
來近又養張逆之子布作魯克二人以爲他日用然羣
回再被搜括不肯復爲所愚卽布魯特亦憾其苛稅貌
從心快非嚮日夷回一氣易于煽惑之比祇以巢穴險
遠我至彼去我去彼來但能撫馭回民堅壁清野卽可
收以回制夷之效或謂回疆堅壁易而清野難不但回
戶盡入回城有人滿之患且回地半耕半牧若盡驅牲
畜掃羣而至何以處之是在使回民仿內地堡寨之
法相地扼險緩急入保寓清野于堅壁尤守邊大利不
在屯田之下是在得人哉是在得人哉

